

05.maj 2015

**Naalackersuisut danskit naalagaaffiannik kiisalu danskit soraarnerussutisiaqalernissamut aningaasaateqarfiinik Kalaallit Nunaannut aningaasaliisarfimmik aningaasaateqarfiliortoqarnissaa namminersorlutik oqartussanut soqutiginaateqarnera pillugu apeqquteqaat aallaa-vigalugu oqallinnissamik siunnersuut. Aningaasaateqarfiliortoqarnissap anguniangarivaa siunissami inuussutissarsiornikkut suliassanut, ilaatigut aatsitassarsiornikkut, takornariaqarnermut, aalisarnermut, ataqatigiinnermullu aaqqissuussinermi suliassanut avataaniik aningaasaliisalernissaq.**

(Inatsisartunut ilaasortaq Justus Hansen, Demokraatit)

Inatsisartunut ilaasortap Justus Hansenip oqallisissiaanut siumumiit qujalluta ima oqaaseqaateqas-saagut:

Siumup tunngaviusumik siunertaasa ilagaat, Inuiaqatigiit nunamik tunniussai akisussaassuseqar-tumik atorlugit avataaniillu pisariaqartitatik iluaqutigalugit imminut napatissinnaalerlutillu aqussin-naalersimasut pilersissallugit.

Oqartarpugut ila nunarput isorartoqaaq aammalu nunarput tassaasoq Nunarsuatta sutigut assigii-nngitsorpassuartigut peqqumaasivia. Peqqumaatilli taakku ilaannanngui ullumikkut atugaraagut. Taakkunannngali atuinerput ullutsinni tassaavoq nunatta aningaasaqarnikkut isumalluutaa. Taakku-nannngali atuinerput tassaavoq ilaqutariit ataasiakkaat nunatsinni ilaqutariittut napassutaat. Taamaat-tumik eqqartugassaq una mianersuullugu aammalu pingaartilluinnarlugu eqqartorneqartariaqarpoq:

Siumumit avataanit aningaasaliisoqarnissaa pingaartsikkatsigu erseqqissaatigissavara. Oqallisissior-tup qulequtsiinnermini ersarilluinnartumik eqqaavaa avataaniit aningaasaleerusuttunut Naalakker-suisut aningaasaateqarfiliussasut. Ersarissumilli allassimallugu danskit naalagaaffiannik kiisalu danskit soraarnerussutisiaqalernissamut aningaasaateqarfiinut tunngatinneqassasoq. Tamanna uggor-nartutut Siumumiit nalilerusupparput. Tassami Nunarsuatsinni aningaasaliisartorpassuit oqaluttar-fikkut ugguuna mattunnaveersaarnissaat pingaarluinnartutut Siumumiit isigaarput. Tassami Siumu-mi isumaqarpugut aningaasaliisinnaasoq, nunatsinnullu iluaqutaasumik iliorsinnaasoq sumi nuna-qarneq apeqqutaatinnagu assigiimmik periarfissaqartinneqartariaqartoq.

Taamatuttooq maluginiakkatta ilagaat Naalakkersuisut danskit nunaanni aningaasaliisarfiit danskit ministeriat peqatigalugu aningaasaliisartut periarfissaannik pitsaannerusunik ujartuisoqarnissaa pillugu misissuisoqartoq. Taamatullu aamma EU-mi qularnaveeqqusiisarfiit taakkartorneqarput Naalakkersuisut akissuteqaataanni.

Ineriartoqqinnissamut aningaasaq nunatta pisariaqartippaa. Sutigut tamatigut nunatta pisuussutaasa pilerigineqaleraluttuinnarnerat tusarsaavoq. Nunattalu pitsaanerpaamik pissarsiaqaatigissaguniuk pisuussutitta suliarineqaqqaarlutik anninneqartarnissaat avaqqunneqarsinnaanngilaq. Taamaattumik Nunarput pitsaanerpaamik teknikkikkut atuisariaqarpoq, aammalu sukkasuumik tunisassiorsinnaasariaqarluni. Tamanna sutigut tamatigut atuuppoq; aalisarnermi, aalisakkanik suliarineqqiineramik, aatsitassarsiornermi, nunaateqarnermi allarpassuarnilu. Teknikkikkulli siuarsaanissaq akisooq nunatta pisariaqartippaa taamaattumik aningaasaliisussanik pitsaasunik nassaarnissaq pisariaqarpoq.

Siumumiit nuannaarutigaarput Naalakkersuisooqatigiinnissamik isumaqatigiissummi Nunap ataqatigiinnissaanut attaveqaasersuutit pitsanngorsarniarneqarmata. Mittarfiit nutaat, tallisat. Aammalu umiarsualiviit pitsanngorsaaviginiarneqarput. Tassuunami nunatsinnut aningaasaliisinnaaneq kajuminnarnerulersinneqarsinnaasoq Siumumiit isigaarput.

Aningaasaateqarfiit aningaasaliinerisigut suliffissaaleqineq appariartussaavoq. Tassami aningaasaateqarfiit aningaasaliinerisigut suliffeqarfimmik pilersitsinissaq qulakkeerneqarsinnaavoq, tassanilu piumasaaqatigineqartariaqarpoq nunaqavissut ilinniartinneqarnissaat.

Naggataatigut kommunet namminneq aningaasaliisussarsiornerat siumumiit nuannaarutigigatsigu oqaatigissavara. Aammattaarlu kajumissaarlugit aningaasaliisussarsiorneq atorluaqqullugu.

Taamatuttooq oqallisissiap soqutiginaqisup qulequttamigut allannguuteqartilaarlugu qaqqeqqinnearnissaa soqutiginartissavarput. Danskit kisimik aningaasaateqarfimmut ammaanpeqaratik nunarsuarmioqativut aamma peqataatinneqarnissaat Siumumit kissaatigaarput.

Ineqi Kielsen

Siumut